

解。俄人于其时因布加里亚之衅与土人构难，于是俄、奥、德三国私相定约，以胁土人。其中一条：五大国各驻兵土境，迫令土人改易制度从西洋，保民制国，诸国皆得与闻。即定约，以告英人。英人曰：土耳其亦自立之国，万国公法无相逼胁之理。且同为会盟之国，不应先定约而后以闻。拒不允。乃议五大国遣使至君士但丁会议。俄使意格纳谛尔弗言：布加里亚宜自立国，视基伯尔得所绘图为界，自阿德里亚、法尔拉外，凡界黄色者皆属之布加里亚。于是会议五条：一、满得尼格洛、色尔非亚宜与土另定条约；二、玻斯里亚、赫尔斯戈维拉为土属国，宜改定管辖情形；三、改定管辖布加里亚情形；四、各国遣员赴玻斯里亚查勘；五、各国遣员至布加里亚查勘。土（土）人不允，遂有今日之战。以利害校之，则会议条约优矣，然俄人蓄意倾土耳其，日寻衅端，更无善策。其时驻土公使爱里约得现充驻奥公使，曾遣从官百尔林至布加里亚看察情形，亦不尽如俄人所言也。

十四日。接上海腊月初一日第五十七号包封，由法国低立华地公司船递到，内刘芝田、黄泳清各一信。《申报》载沈幼丹劾奏刘咸、杜文澜以下各员吸食洋烟，崇文山、邵汴生查奏河南详撤报灾各员，两奉上谕：刘咸、杜文澜、李德溥、曾绍勋、李诚均革职；刘齐銜革职；李庆翱降二级调用。此近年举措之最当人意者，阅之为一快。发总署第十七信，合淝伯相第十八信，及沈幼丹、梅小岩、唐景星、金眉生、江芾生，及家信第十七号，及意城、志城，及子瀚侄。是夕，沙耐斯百里侯邀茶会。马克里以予伤风，戒不出门，因属马格里为一书辞之。

十五日。弗赛斯来见，言印度产茶日盛，岁运至伦敦三千万磅，与二十年前中国茶运至者略同，今中国已逾万万磅矣。问阿